

**GIU PIPIYA**  
**ASI BUKA.**  
**SALAMO BA TABORA.**

**S.P.C.K.**

264.03 MUK

MOORE COLLEGE  
LIBRARY

A. Capell,  
Nov. 26, 1923

---

MOORE THEOLOGICAL COLLEGE LIBRARY



3 2042 10014931 3





# GIU PIPIYA ASI BUKA.

SALAMO BA TABORA.

[PSALM AND HYMN BOOK IN THE MUKAWA LANGUAGE.]



LONDON:  
SOCIETY FOR PROMOTING CHRISTIAN KNOWLEDGE,  
NORTHUMBERLAND AVENUE, W.C.

1905.

MOORE COLLEGE  
LIBRARY

## GIU PIPIYA ASI PARI.

*Pepeta.*

**T**AMA ba Natu ba Kanuma Kao'aobaisiena Wabasiai.  
Amen.

Bada ki nuanuanikai.

*Keriso ki nuanuanikai.*

Bada ki nuanuanikai.

**T**AMAKAI . . . Kau ponaguguna kega ke aurabaikai ;  
*Kega ba goyonai ki taraparanikai. Amen.*

Ta na raupari.

**T**AMAKAI, niko Am yoveyai ki taraparanikai, ba  
nuanuakai kega si na kairagaraga, ba kau naom  
ka na pepeta ba ka na kaobaisiem ; Iesu Keriso ama  
Bada kairavina. Amen.

*Salamo.*

*Baiaua.*

*Tabora.*

*Raupari Didibara.*

**B**ADA God karakuyona pomai ka daua ba kom ku  
kaiparikai. Kom ku wona ba mara i rauyasegana.  
Ama wona ba ama wose goyosi ki kasi'upupunisi ; Am  
wona ba Am 'udura ki beyebeyikai ba ka na nonorisi.  
Ki baisikai ba Am waina ka na bosisiriei ba kaurim ka

ni yaraka. Iesu Keriso ama Bada kairavina ka na raupari. Amen.

*Raupari Rabisiai.*

**A** MA Bada Bainuanuanim, matapa ku wonei piraga goyo 'ipiyisi karakuwata kega si na gae kau sapama, ba ku no'onori yakai ere-onoakai piraga goyo 'ipiyikai. Ama pari karaku ke notai, ba Iesu Keriso matapa kairavikai i i tuparatui, kona gubana'i ama piraga goyo ki buruburuisi. Kom ama Taupaumim kama kam ke berikai, gubagubagisi ki yawasisi. Pomai ke kaiparikai. Ki beyebeyikai ba ama dudura si na gaire. Iesu Keriso kairavina ka rarauparim. Amen.

**G**OD, Maragatasakina, Tama, Natu, ba Kanuma Kao'aobaisiena ana baigairenina kaurimi i na madamana. Amen.

*Kega ba nikona ;*

**A** TA Bada Iesu Keriso Ana baibaita, ba God Ana nuayauyauna, ba Kanuma Kao'aobaisiena Ana baikesanina ere-onoata kaurita i na ma damana. Amen.

*Piraga Goyo Baiavina.*

**T**AMA Maragatasakim, Bainuanuana bitam, yakai ka nekiokio, ba gamogamo siwasiwanisi rautainisi Am keta ka i saumarei. Yakai ama rori taini ba ama waina ka i saununurisi. Am Wona kao'aobaisiesi ka i kawakasekasesi. Saibira ka ta saibira wasi ka i saumarei ; ba saibira ka ti sinikaikaiei ka saivirei. Kaurikai kega gairena e mamana. Saba Kom, Bada, ki nuanuanikai, ka bi kayosukusuku wasi. Asi piraga goyosi te baiavisi wasi Kom ki buruburuisi. Nuanuasi te nenebirabira wasi ki taraparanisi ; Nanaka-



sike Kom pipiya ku kaobaiyoyobani Kerisoai Iesu ama Bada. Ba ki bereyana, Tama Bainuanuana bitam, kona gubanoi, ba yakai ama piraga si na gaire, ba ka na maguguba, ba Kam Waba kao'aobaisiena ka na bokabakabari. Amen.

### *Raupari.*

**A** MA Bada God, matapa ku wona ba pipiya ere-onoakai kaurim ka ti yaraka: yakai ama piraga goyosi ki buruburuisi Iesu Keriso kairavina. Kanumim ke berikai ba i ni beyebeyikai ba wonam ka na kuiru. I ni baisikai ba Satani ana dudura ka ni sinikaikaiei. Natum Iesu kau kibina ka ti saununura ba kaurim kau sapama ka ta gae. Iesu Keriso kairavina ka ra raupari. Amen.

**A** MA Bada God, dobu Wosewosena, ama Taupaumim, yakai natunatum nuanuam ka yauyauni, ba Yām kaurikai i i gaire. Kama kam ke berikai marana ke patepatei; gubagubagisi ki yawasisi; ama meyaga ke kaiparisi, kama abiabia ki gesisi, ba yakai ka na maguguba. Kona Kom matapa ku wosei ba nuanuaki i i gaire ke wosei damanei ba ka na bokabakabarim. Ama raupari Iesu Keriso kairavina ke nosi. Amen.

### *Pari Pipiya kairavisi kau Nu Gini e bi Misinari.*

**K**A bi babaim Bada, ba kosi ku oreorisi wasi Am Basileia Nu Giniak rakatana kaurina ki gairena kabitamnisi, Kanumimai Kao'aobaisiena ki kotisi, abanaganagarana ke kaiparisi, wabam gwabinai si ta mana, ki baisesi ba Am wona si na bosisira damanisi. Ba pipiya wabamai te baiavi wasi te nonosi nuanuasi ke tainisi ba ki bereyana ba te nosinosi wasi ere-onoasi kau baiyawasa wauna si na bomsiri.

Ba Ekalesia ana ipiyisi Australiai raupari ba bere kanumina ke berisi, ba Baibaiyonayonisi pesarisi nike

Am kau 'obaitaura si na riu ba kanukanuma kairavisi ku rabobo wasi si na bobaitaurisi. Am Tama ba Kanuma Kao'aobaisiena kosi ko mamadamana ba ko bi bada damana. Amen.

*Didibarai.*

**B**ADA God, a bi kaikaivim, pomai ku kaipariku, ba niko maranai a bo'omsiri. Kanumimai a ta nosi-danim, ba Natum Iesu Keriso au Baibaiyawasina a ti saununuri. Au Saibira ki baisiku ba Am kau kadara a na saibira. Kawaku ke potai ba kega awaki goyona a na wona. Iesu Keriso ama Bada kairavina. Amen.

*Pomai.*

**A**KU Bada, Bainuanuana bitam, ke kitaiku. A ta daua, ba a bi nuagoyo au piraga goyosi kairavisi . . . Ki buruburuisi, Bada Iesu Keriso kaurina. Nuanuaku ke tainabirai ba goyona a ni sinikaikaiei. Pomai turaturaku kosi ke potaikai. Ere-onoakai Kanumim Kaoaobaisiena ke berikai; ki beyebeyikai ba ka na nosikabitamnim; ki baisikai ba ka na bosisirim; ke aurabaikai ba kaurim ka na botu. Ama Bada Iesu Keriso kairavina. Amen.

GOD 10 WONANA.

God nikosi wona i baiavisi, i wona. Yauku Jehovah am God.

I.

**B**AGUNAI ba God mutusi naokuai.

II.

Bagunai ba taurabaibaisaka ku ta tasi, kekona sapama kaidamo e mamana wasi gubanai rautainina, kekona tano gaburai e mamana wasi, kekona okoa tano



gaburinai. Bagunai ba kaurisi ku ta pepeta, kekona ku ta bi yaraka; yauku Jehovah am God, yauku God nuanuaraviku; tamatama asi piraga goyosi natunatusi kaurisi gudu a tereterei, kau pata baitonuina bayebo kau pata baibataina te bi sinikaikaieku wasi kaurisi, ba tausasi te bi nuayaunyauniku wasi a bi nuabigabigaisi, ba aku kaosaburerena te genuvisi wasi.

### III.

Bagunai ba Jehovah am God kana Waba ku ti namei: Jehovah kega i ni buruburuei, kana Waba e namei wasi.

### IV.

Sabate marana ke nosi ke kaobaisiei. Mara nima masiana yaro masi kesana ku na saibisaibira, ba am saibira ere-onoana ku na saibirei; saba mara nima masiana yaro masi ruamo Jehovah am God ana Sabate. Kega awaki saibira ku na saibirei pasika, kom, ba natum sebarena, kekona natum wasikena, am yaraka, kekona am yegeyege, am gamogamo, kekona ta'damna am matamketeiai e mamana wasi. Mara nima masiana yaro masi kesana, Jehovah sapama ba dobu i wosisi, boga ba ere-onoana e mamana wasi, ba mara bai nima masiana yaro masi ruaina i i yakam: gubanai Jehovah sabate marana i i gaireni ba i warai.

### V.

Tamam ba sinam ke kaobaisiei; ba am mara si na pesara kupurai Jehovah am God e bereberim wasi.

### VI.

Bagunai ba ku ta kasibunui.

## VII.

Bagunai ba ku ta raukaipara.

## VIII.

Bagunai ba ku ta pisikara.

## IX.

Bagunai ba turam ku ta sisiana kwarumei.

## X.

Bagunai ba turam ana yove ku ta kirorovei, bagunai ba turam kaoana ku ta kirorovei, kekona ana yaraka kekona ana yegeyege, kekona ana bulamakau, kekona ana asine, kekona ana sawara awaki turam karinai.

# SALAMO.

## SALAMO 3.

**B**ADA, kau abiabia si pesara : pesarisi kauriku si bomsiri.

2 Pesarisi kanumikuai te wonewonei : Ana baibaita God kaurina kega.

3 Ba kom, Bada, au bero : au kadara, ba gayamiku ana bokabakabara bitana.

4 Gamokuai Bada a oreorei : ba ana koyai kao'ao-baisiena e kao'aobeyebeyiku.

5 Yauku a daua ba a kenowawapa : a kenomataka, Bada e bo'okisiku.

6 Pipiya pesarisi kega a na nagarisi : kosi si msipiniku.

7 Ke bomsiri, Bada, ki yawasiku, aku God : kau abiabia ere-onoasi kau kapakaesi ku ravisi ; pipiya goyosi nibosi ku kasigaovorisi.

8 Baiyawasina Bada karinai : am baigairenina am pipiya kaurisi.

## SALAMO 4.

**A**U piraga monikina ana God ke kaobeyiku, sirinai a oreorei : au nuagoyonai ku taraparaniku ; ki nuanuaniku, ba au raupari ke nonori.

2 Komi pipiya natunatusi, mara biamo au kadara i

ni tepakumara : mara biamo kwebana ko ni nuayau-yauni, ba kwaruma ko na nuveni?

3 Ba ko na nosi, ba Bada piraga gairena pipiya kona kairavina i terei : Bada i na nonori, sirinai a oreorei.

4 Ko ni yagisi, ba kega ko ni piraga goyo : nuanuamiai ko sisia, ami kau daudaua, ba ko maguguba.

5 Piraga monikisi asi puyobunua ko na berei : ba Bada ko ni tumagei.

6 Pesarisi te wonawona, Kotoi gairena i ni beyikai : Bada, naom ana yasegana kaurikai ke bokabakabari.

7 Nuanuakuai baigairenina ku terei : sirinai asi palawa uana ba asi wain si pesara.

8 Kau rom a na daua ba a na kenowawapa : kom Bada, ku wosei ba baiyawasinai a mamana kabitam.

#### SALAMO 8.

**G**OD, kama Bada, kam waba kau dobu ere-onoana i gaire sabureri : Am kadara kau sapama ku terei.

2 Pipiya gunaguna ba tomatomanisi kawasiai bai-maragata ku wosei, kam abia gubasiai : ba abia ba biwa yaunina si ta maguguba.

3 Sapama a kitakitai, yaro rakorakom asi saibira : nawaravi ba gwamegwame ku wosei wasi.

4 Pipiya awakina, kom ku bi nuasuyai : ba pipiya natuna, kaurina ku botubotu?

5 Kona ku wosei ba kega God nanakasike : ba kadara ba bokabakabarina ku berei.

6 Yarom asi saibira kaurisi e bi bada : ere-onoana kau kaena ku terei.

7 Sipu ba bulamakau ere-onoasi : damanina ba siaua garagarai.

8 Sapama manuna, ba boga iana : boga kau ketana te nene wasi.

9 God, kama Bada : Kam waba kau dobu ere-onoana i i gaire saburere.



## SALAMO 23.

**B**ADA au baibaipayapayaya : soya kega a na robobo.  
 2 Kau kwapu matamatagina e bi dauviku : au okoa morumorubisi e raurabaiku.

3 Kanumiku e bi yawasi : ketai monikisi e bi naoviku kona wabana kairavina.

4 Damanina ba kawanina wakunana a ta yewosonagei, ba kega awaki goyona a na nagarei : kom kau-riku ko mamana; am kwapu ba am ruakuna te bi morumorubiku.

5 Au sorama ku bo'okabikabitamni kau abiabia naosiai : gayamiku ku i boroï; au vedu e kamsewasewai.

6 Damanina gairesi ba bainuanuana si.ni saununuriku au mara ere-onoasi : ba Bada ana yoveyai a na yoveboa damana.

## SALAMO 24.

**D**OBU Bada karinai, ba ere-onoana kamonai e mamana wasi : dobu, ba kosi e yoveyoveboa wasi.

2 Kau boga i i bunei : ba kutukutuba i bokabikabitamni.

3 Kotoi Bada kana kau koya i na gae : ba kotoi kana kau gawara kao'aobaisiena i na msiri?

4 Kona yaroyarona monamonasi, ba nuanuana monikina kaurina te mamana wasi : kotoi yana kau kwebuna kega i bokabari, ba kega i kaobaiyoyobani kwaruma.

5 Kona bainuagairena Badai i na yauni : ba baimonikina baiyawasina ana Godai.

6 Niko kosi te nuvenuveni wasi asi pata : ba kosi naom te nuvenuveni wasi, Jacob.

7 Gayamimi ko bokabakabari, komi kabapotapota-imi, ba komi ko na bokabakabarisi, kabapotapota damanimi : ba kadara kana Taupauma i na riu.



8 Kadara kana Taupauma kotoi : Bada maragatasa-kina, Bada maragarina kau baiowa.

9 Gayamimi kabapotapotaimi, ko bokabakabari ; ba ko na bokabakabari, kabapotapota mamadanimi : ba kadara kana Taupauma i na riu.

10 Kadara Kana Taupauma kotoi : sabaota asi Bada, kona kadara kana Taupauma.

## SALAMO 34.

**B**ADA a ni kaikaivi baigememei : kana bokabakabarina kau kawaku i na madamana.

2 Kanumiku Bada kaurina i ni kaiwabo : magugubisi si na nonori, ba si ni nuagaire.

3 Bada yauku kosi ta na kaobaigaegaeni : kana waba ta na bokabakabara yabatei.

4 Bada a sarekwi, ba i kaobeyiku : ba aku kau bainagara i tarapaniku.

5 Kosi kona si kitananagi ba si nuagaire : ba kega tepasi si na kumara.

6 Niko pipiya i tou, ba Bada i nonori : ba nuagoyonai ere-onoasi e bi tarapani.

7 Bada ana anela te kumakumarei wasi kaurisi e to'ompipinisi : ba e to'ombaubaunisi.

8 Ko ni dami ba ko na kitai, Bada e bi gaire : bai-baiga renina kona e tumatumagei wasi.

9 Bada ke kumarei, komi ana kao'aobaisiesi : te kumakumarei wasi kaurisi soya te raborabobo.

10 Leona natunatusi te moyamoyaka, ba soya te raborabobo : saba Bada te saresarekwi wasi kega awaki gairena i na wainei.

11 Pipiya gunaguna, ko msiratu, ba ko tainabainegiku : yauku Bada ana kumara a ni beyebeyimi.

12 Me'o pipiya ba baiyawasina e waiwainei : ba mara pesarisi e bi nuayauyauni ba gairena i ta kitai.

13 Pepem goyonai ki gesei : ba kipurum kega si ta sisia kwaruma.

14 Goyonai ki saumarei, ba gairena ke wosei : rom ke sarekwi ba ki saununuri.

15 Bada matamatana pipiya monikisi si nosinosisi : ba tainana asi parara kaurina te tamotatara.

16 Bada naona piraga goyosi pipiyisi e bi sinikaikaikaiesi : ba asi nuaraupairina i na wadoisi.

17 Monimonikisi si tou, ba Bada i nonorisi : ba asi nuagoyo ere-onoasi e bi taraparanisi.

18 Bada kosi nuanuasi si goyo gwabisiai e mamana : ba nuanuasi te nenebirabira wasi e bi yawasisi.

19 Pipiya gairesi asi sidasidaba pesarisi : ba Bada ere-onoasiai e bi taraparanisi.

20 Sirisirikesi ere-onoasi e potapotaishi : kega asi kesana e kasikasikotobi.

21 Goyona pipiya goyosi i na sirageyisi : ba kosi pipiya gairesi te bi sinikaikaikaiesi wasi si ni buibuiya-baisarobisi.

22 Bada kana yarayaraka kanukanumisi kawapataina e sarosarobi : ba kosi konai te tumatumagei kega si ni buibuiya baisarobisi.

### SALAMO 39.

**A** WONA, aku keta a na potai : pepekuai goyona kega a na baiavi.

2 Nigora kawakuai a na terei : sirinai piraga goyosi 'ipiyina matakui e mamana.

3 A i kawagumegume, a kaoguguba : wona gairena a i sinikaikaiei ; ba au ababainuagoyo i rakata.

4 Nuasineku i boraborai ; a i nuasuya wasi ba kiyama i kasiri : pepekuai a i sisia.

5 Bada, aku turina ki beyebeyiku, ba au mara asi baiavina : au abatakotako ki beyebeyiku.

6 Ke kina, au mara pipiya yarona rubana nanakasike ku wosei : ba matamiai aku baiyawasina kega awaki ; damanina ba pipiya ere-onoana e bi kaiwabo ba kosi yasibena wata.

7 Damanina pipiya e yewoyewonae kaiwakuna nanakasike, damanina e bi nuaboa kwebusi kaurisi : sawara e bi gaenisi, ba i na yaunisi wasi e bi buruburuei.

8 Ba karaku, Bada, awakina a potapotai? aku bai-potaina kaurim.

9 Aku piragai goyosi ere-onoasi ki taraparaniku : pipiya maruapina ana baigigimai kega ke teriku.

10 A i kawagumegume, kawaku kega a tatari : gubana i Kom ku wosei.

11 Am kwapu kaurikuai ke naveyei : yarom ana abaraua i pupuniku.

12 Sirinai pipiya ku i kisi ana piraga goyona kaurina, ere-onoana nuanuana e yauyauni ku pupupuni, arabembemta rautainina : damanina pipiya ere-onoana kosi yasibena wata.

13 Aku raupari ke nonori, Bada, ba au tou ki tainabainegei : a toutou ba kega ke maguguba.

14 Yauku ta-pipiya kaurim : pipiya e yoveyoveboa, tamatamaku ere-onoasi nanakasike.

15 Ki nuanuaniku, ba a na maragata : ba a na nae, ba kega a na mana.

#### SALAMO 51.

**K**I nuanuaniku, God, am baiyagairena nanakasike : am bainuanuana pesarina nanakasike au piraga goyosi ke kasiupupunisi.

2 Goyonai ki eka kabitamniku : ba au piragai goyona ki gaireniku.

3 Au wosewose goyosi a nosinosi : ba au piraga goyona naonai e mamadamana.

4 Kom wata kaurim au piraga i goyo, ba goyona matamiai a wosei : ba sirinai ku bi sisia ku ta matototrina, ba gairena sirinai ku bi buibuiya.

5 Noi, goyonai a tupua : ba piragai goyona sinaku i manaviku.



6 Noi, baisauwona kamonai ku waiwainai : ba bai-buneyanai nuasuya ku bobaikuiriku.

7 Isopai ki gaireniku, ba a ni monikina : ba ki ekiku, ba snow a ni poepoetawani.

8 Ke wosei ba baisaka ba baigairenina a na nonorisi : ba sirisirike ku kasikotobisi wasi si ti sake.

9 Au piragai goyosi naom ki buniyei : ba au goyosi ere-onoasi ke kasipupunisi.

10 Nuanuaku gairena ke wosei, God : ba kanuma totorina kamokuai ke wosei.

11 Naomai kega ki garutaveyiku : ba kega kauriku kanumim kao'aobaisiena ki yauni.

12 Am baiyawasina ana bainuagairena ke bere-meyiku : ba kanuma nuanai kosi ke bobaimsiriku.

13 Damanina ba kosi te wosewosei goyosi wasi am keta a ni beyebeyisi : ba piraga goyosi 'ipiyisi kaurim i na nuabirabira.

14 Tarautusewai ki taraparaniku, God, baiyawasiku ana God : ba pepeku am piraga gairesi i na ravisi.

15 Bada, kipuruku ke botatarisi : ba kawaku am bokabakabara i na yonayona.

16 Puyobunua ku bi sinikaikaiei ; kega ba a ta berei : ba puyobunua kapukapunana kega ku ta wainai.

17 God kana puyobunua kanuma tamokotoba : nuana tamokotobina, God, kega ki sinikaikaiei.

18 Ki nuagaire ba Zion kaurina gairena ke wosei : Jerusalem kana gara ke boaisi.

19 Kona sirinai piragai gaitesi asi puyobunua i ni nuagairenim, kau puyobunua kapukapunana ba puyobunua tupana : kona sirinai bulamakau am kau rauna-bonabo si na berisi.

#### SALAMO 53.

**N**EGANEGA nuanuanai i wona : God kega.

2 Kosi baibaitunibonesi, ba asi piragai goyosi si goyosaki : kega kotoi ba gairena e wosewosei pasika.

3 God pipiya natunatusi sapamai i i giovisi, i ta kitaishi : memei yakatei si ta kuiiri ba God si ta nuveni.

4 Saba si takeyana, ere-onoasi si ma kaba : bayebo kega kotoi gairena e wosewosei ; kega kesanaikei pasika.

5 Piraga goyo 'ipiyisi kega kuikuirisi kona : aku pipiya te kanikani wasi, bage palaua si ta kani, God kega si orei ?

6 Namai nagara kega, ba kosi si nagara : te bi karasimi wasi, gayamisi God i kiarebuisi, God i kasitaveyisi kairavina, ku i verasiwasiwanisi.

7 Ariyo ! Kotoi Israel-ipiyisi kasi abayawayawasina Zionai si na berisi : sirinai God ana 'ipiya patupatunisi i na aurabameyisi, maranai Jacob i ni sake, ba Israel i ni nuagaire.

## SALAMO 67.

**G**OD ki nuanuanikai, ba ki gairenikai : yakai kosi naona i na rauyaseganikai ;

2 Ba kau dobu am keta i na nosi : am baiyawasina damsia ere-onoasi kaurisi.

3 Pipiya si na bokabakabarim, God : pipiya ere-onoasi si na bokabakabarim.

4 Damsia ere-onoasi nuanuasi si na gaire ba si na tabora : ba pipiya ku ni buibuiya kabitamnisi, ba damsia dobuai ku ni naovisi.

5 Pipiya si na bokabakabarim, God : pipiya ere-onoasi si na bokabakabarim.

6 Dobu i ua : ba God, ama God i ni gairenikai.

7 God i ni gairenikai : ba dobu pusirina pusirina si ni kumarei.

## SALAMO 70.

**G**OD, baitaraparaniku kaurina ke daru : baibaisiku kaurina ke boyagiyagina, Bada.



2 Kanumiku te nuvenuveni wasi, te i sinimaya, te i sinikumara : baisininomosiku te waiwainei wasi ki ne veramagisi ba ki gigimisi.

3 Si ta veramaga kasi baisinimaya kaurina : te wona-wona wasi, Kitoa, Kitoa.

4 Te nuvenuvenim wasi si ti sake ba kom kaurim si ti nuagaire : ba am abayawayawasina te wadiwadiyei wasi si ta wona tupetupena, God si ti kaobaigaegaeni.

5 Yauku saba moyakiku ba kwaikwaiyaniku : kau-riku ke daru, God.

6 Kom aku Baibaita bitam ba aku Baitaraparana bitam : Bada, kega ke nebaikikima pasika.

#### SALAMO 90.

**B**ADA, ama abakobakoba : pata masiana kau pata masiana.

2 Koya si tupua naoai, yebo tano ba dobu si wosei naoai : Kom God damanai, ba dobu kega turina.

3 Pipiya ku taitaina popori : kata ku wonawona, Ko veramaga, pipiya natunatusi.

4 Matamai bodu tausana, rabirabi te rarautaini : kona koyaga pomai rautainina i kakaba wasi.

5 Ku bi baubauranisi wasi, kenowawapa te rarautaini : ba te bururibiribini gwanewa nanakasike.

6 Didibarai matagina e rarautiti : rabisiai saba i petoi, e maomaoa ba e sivisivi.

7 Am yagisiai ka karakarata koboia : ba am dadaurai baikokonina ka naganagara.

8 Ama piraga goyosi kau matam ku taurisi : ba ama wose goyosi baibaibuniyisi naom kau raranina.

9 Sirinai ku da'adaura ama mara e ka'akaba : ama bodu ka rauroboisi baiaia si baiavi rautainina.

10 Ama bodu asi mara bodu 70; ba pipiya i ta maragata 80 nanakasike : asi maragata e bi bage ba bainuagoyo; e burukakaba ba ka manae.

11 Saba kotoi am dadaura ana maragata e nosinosi : pipiya i ta nagara wasi nikasike am baiyagisi?

12 Ki beyebeyikai ba ama mara ka na baiavisi : nanakasike nuanuakai ka na bobainuasuyisi.

13 Bada, muriai ke msibira mena : ba am yarayara-ka ki yagairenisi.

14 Bainuanuamiai ke burubaibonuvikai : nikasike ba ka ni sake ba ka ni nuagaire, ama mara ere-onoasi.

15 Ku kasibaigoyoikai wasi kana pata ke suarabai-morumorubikai : ba bodu goyosi ka kabarisi wasi kasi pata.

16 Am yarayaraka Am saibira ki beyisi : ba natu-natusi am kadara.

17 Ba Bada am God ana morapa ere kadarina kauri-ta e mana : nimakai asi saibira kaurikai ki gaireni; ama bosaibira ki gaireni.

## SALAMO 100.

**B**ADA kaurina ka na tabora, dobu ere-onoami : nua-nuami i na gaire, ba Bada kaurina ko ni yaraka, naonai ko na tabora botu.

2 Ko na nonori Bada kona God : kona kota i wosita, kota kona karinai; kota ana 'ipiyisi, ba ana kwapu ana bapayapayaya.

3 Ana kau matamketa ko na riu ba ko ni kaikaivi, ba ana kau debadeba ko na bokabari : ko ni kaikaivi, ba kana waba ko ni gaireni.

4 Bada gairena; ana bainuanuana e mamadamana : ba ana nosi pata ere-onoasi e mamadamana.

## SALAMO 121.

**K**AU koya a na gagana : au baibaita mekei?

2 Au baibaita Badai : sapama ba dobu asi wose bitana.

3 Kaem kega i na ne kiokio : am potapotaina kega i na kenowawapa.

4 Noi, Israel 'ipiyisi asi potapotaina : kega i na kenowawapa ba matana kega si na pota.

5 Bada am potapotaina : Bada am wakuna kasau-mai.

6 Kaoai kao kega i na rarabunuim : kega ba pomai nawaravi.

7 Bada goyonai ere-onoana i na potaim : kona kanu-mim i na potai.

8 Bada am kasibau ba am riu : karaku ba karaku wata i na pota damanei.

# SALAMO 122.

**N**UANUAKU i gaire sirinai si wonei wasi : Bada ana kau yove ta na nae.

2 Kaikai te msimsiri : am matamketa kamosiai, Jerusalem.

3 Jerusalem, kom tamoboaim : meyaga e ma kutakutuba rautainina.

4 Damsi nokoi te gegae, Bada ana damsi, matakira Israel 'ipiyisi kaurisi : baikaikaiwa Bada kana Waba kaurina.

5 Abamamana nokoi, baibuibuiya kaurina : David ana 'ipiya asi abamamana.

6 Jerusalem ana rom kaurina ko na raupari : nuanuasi kom e yauyauni wasi si na gaire.

7 Rom am papa kamosiai i ta mana : ba baigarena am yoveyoveyai.

8 Warewaresiku ba turaturaku kaurisi : rom kaurim a ni sisiyei.

9 Bada ama God ana yove kairavina : am baigarena a na raunuveni.



## SALAMO 123.

**K**AURIM a gagaua : kau sapama ku makimakira wasi.

2 Yarayaraka rautainisi matasi asi bada nimana, yegeyege rautainina asi bada nimana : nanakasike matakai ai Bada ama God, ba i ni nuanuanikai.

3 Ki nuanuanikai, Bada, ki nuanuanikai : te bi gigima tabitabirikai.

4 Nuanuakai marimariyisi asi baigigimai si bonuvei : ba te bi kakaiwaka asi baigigimai.

## SALAMO 126.

**S**IRINAI Bada kau Sion si nae wasi i auraba meyisi : kota te meumeu wasi ta rautaini.

2 Kawata maniba si bonuvei : ba pepeta tabora nanakasike.

3 Etene kaurisi si wona : Bada kosi kaurisi kaikaposi i wosisi.

4 Bada kaurita kaikaposi i wosisi : ba nuanuata te gaigaire.

5 Yakai ama patupatumisi ke botuana meyisi, Bada : okoayokoa rautainisi kau yawara.

6 Kosi te toutoubao wasi : nuanuasi si na gaire ba si na utubaitaura.

7 Karaku e toutounae wasi ba pesi e navenaveyisi : nuanuana i na gaire ba i na botu mena, ba ana potara i na botuvisi.

## SALAMO 128.

**B**AIBAIGAIRENINA ere-onoana Bada e kumakumarei wasi : ba kana ketai e yewoyewo.

2 Yaroyaromasi saibira ku na kani : nuanuam i na gaire, ba ku ni nuagaire.

3 Kaom vine rautainina e uaua wasi, am yove kamo-

nai : natunatum rakaraka olive rautainisi am sorama kaurina.

4 Noi, nanakasike pipiya i ni nuagaire : Bada e kumakumarei wasi.

5 Bada Zionai i ni nuagairenim : Ba Jerusalem kana pesarina ku na kitai am mara ere-onoasi.

6 Damanina ba natunatum natunatusi ku na kitaisi : Rom kau Israel i ta mana.

### SALAMO 134.

**B**ADA ko bokabakabari : komi Bada ana yarayaraka ere-onoami.

2 Komi pomai Bada Ana yoveyai ko msimsiri wasi : ata God ana yove ana kau debadeba.

3 Nimami kau gawara kao'aobaisiena ko bogayei : ba Bada ko bokabakabari.

4 Bada sapama ba dobu i wosei : baigairenina Zionai i ta berim.



# BASUNA.

	No.
Akaiyoari Iesu ... ..	21
A kaobaiyoyobanim ... ..	30
Aleluia! Aleluia! Aleluia! ... ..	19
Aleluia! I bomsiri ... ..	20
Am Basekwa sapamai ... ..	45
Ata Bada Iesu ... ..	43
Bada e bi abia ... ..	31
Bada, kauriku ke yoveboa ... ..	5
Bada, kaurim ka botu ... ..	4
Bada, ke nosikai ... ..	7
Bada, kega damaniku ... ..	23
Bada, kega ka kinanim ... ..	25
Baibainuayaunyaunim ... ..	50
Bainao bitam, ke nosiku ... ..	35
David Natuna Bada ... ..	32
God matanai pesarina te tabotabora ... ..	41
God Tamana, Natuna ... ..	56
Iesu e yawasa mom ... ..	18
Iesu i kausaniku ... ..	49
Iesu ama Baibaiyawasim ... ..	40
Iesu au Bada opaku ... ..	36
Iesu kau Wabana ... ..	42
Iesu Keriso i i yawasa ... ..	16
Iesu, ki tainabainega ... ..	6
Iesu ta ni kaivi ... ..	15
Iesu, yakai karimiai ... ..	51
Jerusalem aku yove ... ..	53
Kanuma Kao'aobaisiem ... ..	29
Kao didibara i gae ... ..	1
Kau kupuramom ku nae ... ..	54
Kaurikai ke botu, Bada ... ..	22
Kaurim a ta botu ... ..	34
Kaurim ka botubotu ... ..	39
Keriso matapa ... ..	44
Kerisitana, ko ni nuagaire ... ..	12

							No.
Ke bi sinikarikari ...	...	...	...	...	...	...	14
Kom ama keta ikesim	...	...	...	...	...	...	38
Kom Baibaiyawasim	...	...	...	...	...	...	26
Kom gairem, Tamakai	...	...	...	...	...	...	46
Komi Bada kau naona	...	...	...	...	...	...	57
Komi Bada kaurina	...	...	...	...	...	...	55
Marana ta patepatei	...	...	...	...	...	...	3
Matapa ta rabisiai...	...	...	...	...	...	...	8
Noi e wona, ke nonora	...	...	...	...	...	...	10
Noi, turata matakira	...	...	...	...	...	...	48
Nuanuaku karaku ...	...	...	...	...	...	...	28
O Baiyakam gairena	...	...	...	...	...	...	9
O Iesu, ku msimsiri	...	...	...	...	...	...	37
Pipiyiku, ke bomsiri	...	...	...	...	...	...	2
Pomainaki pota bitasi	...	...	...	...	...	...	11
Rabaraba koya e mamana...	...	...	...	...	...	...	13
Rom, kariteiai, niko kau dobuna	...	...	...	...	...	...	24
Ta na tabora Iesu ...	...	...	...	...	...	...	47
Tabora ta na ravi ...	...	...	...	...	...	...	17
Tama Sapamai ikesim	...	...	...	...	...	...	33
Tamakai, natunatum karaku	...	...	...	...	...	...	27
Tamakai mamadamanim ...	...	...	...	...	...	...	52

# TABORA.

---

1.

TUNE A. & M. 331.

**K**AO didibarai i gae, kaoai i na raranita  
Rabisiai i na yori, yewona i na kakaba.

Ieova kao i terei, saibira i ta saibirei  
Wonana e no'onori, kega i ta totoyana.

Ieova Wosewosena, e beyebeyita,  
Ata keta i naovita kota ta ta yewo neubua.

Kau naona ta na raupari, karku i ni baisita;  
Bada ta ni siniravi, ba i na bopaparita.

Yata kega si ta gisi, ba kega ta ta kwaruma,  
Kega ta ta wona goyo, damanina ta na wona.

Babada si na kauvita ta na bosisirisi;  
Ta na kiruma kabitam nanakasike saibira.

Dobu kota ta mamana, dobu Bada i berita  
Kota ta ni siniravi, Sapamai i na terita. Amen.

2.

A. & M. 3.

**P**IPIYIKU, ke bomsiri  
Ba kao sapamai ke kitai  
Am baiyakam ki kakabi  
Ba am raupari.

Am dudura i ta gaire  
 Me'o marana ku na nae?  
 Gubanai ke ma kabitam,  
 Ba God kaurina ku na gae.

Ke bi sisia kabitam  
 Baisauwona damanina;  
 Ke nosi God kaidamoai  
 Wose dobuai e kitai.

Anela kosi ami Bada God  
 Ke bo'okabakabari,  
 Anela kaoai ba pomai  
 Kana tabora te ravi.

Dobu tupana, Buna God  
 Ba kona ta ni kaikaivi  
 God Tama, Natuna yebo  
 God Kanumina yabata.

## 3.

TUNE A. &amp; M. 50.

**M**ARANA ta patepatei  
 Didibarai ta bomsiri  
 God ere nuanuana  
 Pomai e kaikaiparita.

Gairesi Kabakabaisi  
 Kona e beriberita  
 Goyona ta ta naveyei  
 E bi sinikaikaiei wasi.

God kana ketai ta ta nae  
 Ba ta ta kaibosisiri  
 Nikasike puyomina  
 Gairena ta na panani.



Saibira mom God kaurina  
Ta na saibira kabitam ;  
Bage wawana, dobuai  
Kau sapama ta na gegae.

O Bada ka raupariyim,  
Karaku ke bi baisikai,  
Saibira i na kakaba  
Ba kom kaurim ka ni yakam.

4.

A. & M. 6.

**B**ADA, kaurim ka botu,  
Ka bokabakabarim ;  
Kaona Kom Kuberikai,  
Matamai ka ta terei ;  
Kaoai ka ta kainosim,  
Bada, ke bi baisikai.

Awa'i i na tupua wasi  
Keriso ki gaireni,  
Nuagoyo, gubaga,  
Kom i kesim Kaiwabo ;  
Ke bi porai, ka potaim,  
Baibaiyawasina Kom.

Kom maramaragasim  
Nosinosi damanim ;  
Ba matakai si goyo  
Ku ta auraurabaikai,  
Ki nuanuanikai,  
Ke msibira kaurikai.

Ke nonora Keriso  
Yam i gaire ka nosi,  
Ke bokabi [kabi] tamnikai,  
Ka ti nuayaunyaunim,  
Kaoai bayebo pomai  
Kaurim ka ta mamana.

5.

A. &amp; M. 27.

**B**ADA, kauriku ke yoveboa ;  
 Baidibarai ke bopapariku ;  
 Baibaita bauna kega e mamana ;  
 Bada, ke yoveboa damaniku.

Mara ruamo mom a na mana ;  
 Niko abakadara e nena ;  
 Kesanina ku mamadamana ;  
 Bada ke yoveboa damaniku.

Kauriku kom ke mamadamana,  
 Nike au keta ki naoviku.  
 Kau ponagugua ke potaiku ;  
 Bada ke yoveboa damaniku.

Kauriku Am baibaita i ta mana,  
 Abia kega a ta nagarei.  
 Rabobo ku i owa kabitam ;  
 Bada ke yoveboa damaniku.

Niko dobuna a ni saumarei,  
 Ba korose a na kita kabitamni :  
 Am kau yove ke aurabaiku ;  
 Bada ke yoveboa damaniku.

6.

TUNE, "ROUSSEAU'S DREAM."

**I**ESU ki tainabainega,  
 Pomai kom ki dauvikai ;  
 Kau matam ka raraupari ;  
 Nike ke kaiparikai.  
 Matam kega si na pota ;  
 Baidibarai ke kitai.  
 Ama Baibaiyawasina,  
 Karku ke msiratuikai.

Aneanela ki poraisi  
 Nike si na potaikai.  
 Satani si na kwabini  
 Kega ka na nagarei.  
 Kaoai ku bopaparikai,  
 Ka bokabakabarim  
 Am kau dobu ka ta botu,  
 Baibaita ka ni babaim.

7.

VESPER.

**B**ADA ke nosikai,  
 Ke bopaparikai ;  
 Anela si na potaikai,  
 Ba mara i na tom.

8.

A. &amp; M. 20.

**M**ATAPA ta rabisiai  
 Kaurim, O Bada, si i duvu ;  
 Gubagubagisi si botu,  
 Yawayawasisi si nenaë.

Naina kaku tamarai  
 Yakai gubagubagikai,  
 Bada, kaurim ka msiratu,  
 Ke bi yawayawasikai.

Tasi te gubagubaga,  
 Ba tasi si i nuagoyo,  
 Kega si i nuayaunaunim,  
 Tasi si i sinikaikaiem ;

Te bi yakam resoreso  
 Ere wosesi goyosi,  
 Bainuayauna bitasi  
 Te kumakumaiga meyisi.

Bada, Kom God ba Pipiya ;  
 Ku i siniraua kabitam  
 Ku kita neubuikai,  
 O Baibaiyawasa bitam.

Ba Kom am wose mamanisi  
 Am wona maragasina ;  
 O Bada ke nonorikai,  
 Ba ki yawawayawasikai.

9.

A. &amp; M. 36.

O BAIYAKAM gairena,  
 Baimorumorubim ;  
 O Mara yasegana,  
 O Nimonimorim ;  
 Anela Morapisi  
 Te tabotabora,  
 Trinity kesanai  
 Te kao'aobaisiei.

O Mara pusirina  
 I rauyaseganei ;  
 Maranai kesanina  
 Bada i bomsiri ;  
 Bayebo kom maramai  
 Kanuma i i porai ;  
 I bi gairena sakim  
 Bada ana mara.

Dam ere-onoasi  
 Te notunotua,  
 Ba God te bi kaikaivi,  
 Te raraupariei,  
 Ba ana Waragaire  
 Si i tainabainegei



Asi bainuagaire  
Baimorumoruba.

Baiyakam maimaituai  
Ta ni kakabei;  
Kau mamadamanina  
I na riunita.  
Kanuma ta i kaikaivi,  
Tama, ba Natuna,  
Trinity Kesanai  
Ta ni kadari.

10.

A. &amp; M. 47.

**N**OI e wona, ke nonora,  
Bada e msimsiratu.  
Didibara meumeuna  
Kaoai ki garukirei.

Wona ki tainabainegei,  
Ke bosaburere mom;  
Keriso Yaseganina  
Sapamai e rakata.

Matapa si potapotai  
Ta na botu kaurina,  
Ata piraga goyosi  
I ni buruburuisi.

Ta-sirinai i na botu  
Ere ana kadara,  
Kota i ni yaunyaunita  
Ere nuanuana.

Baigairena, Baikaikaiwa,  
Yebo Baimaragata,  
God kaurina si ta mana  
Dobuai ba Sapamai.

11.

A. &amp; M. 62.

**P**OMAINAKI pota bitasi  
 Si i payapayaya,  
 Baiyonayona bitana  
 Kau dobu i botu.

Ami nagara bagunai  
 Anela i wona,  
 Warana monamonasi  
 A botubotuvei.

Naina karaku kaurimi  
 Baibaiyawasina  
 I tupua, God Keriso;  
 Niko ami boka.

Pipiyaike ko panani  
 Komi matamiai,  
 Ere garana sumana  
 Ba kamkam kamonai.

I wona; ba ta anela  
 Si rerematarea,  
 Ere kadarisi yebo  
 Si tabotabora,

God ata King kaidamoai;  
 Kadara kaurina:  
 Bayebo nike tanoai  
 Rom i na mamana.

12.

A. &amp; M. 59.

**K**ERISITANA ko ni nuagaire  
 Kau Bethlehem kota ta ta nae  
 Niko maranai Iesu i tupua.  
 Ta ni kaikaivi; Ta ni kaikaivi  
 Ta ni kaikaivi, Keriso.

God Damanina, Yaseganasaki,  
Mary kaurina i i pipiya mom.  
Mamadamana, Taupaumina saki  
Ta ni kaikaivi; Ta ni kaikaivi;  
Ta ni kaikaivi, Keriso.

Aneanela, tabora ko na ravi  
Komi Sapama biyimi yebo!  
God kaidamonai ta ni kadari.  
Ta ni kaikaivi; Ta ni kaikaivi;  
Ta ni kaikaivi, Keriso.

Bada, egualau, karku ku tupua,  
Iesu, ka na bokabakabarim;  
Tama Wonana, bio ku kotei  
Ka ni kaikaivim; Ka ni kaikaivim;  
Ka ni kaikaivim, Keriso.

13.

A. & M. 332.

**R**ABARABA koya e mamana  
Meyaga gwabinai;  
Ata Taupauma Keriso  
I tuparatui.

Ababainuagoyo  
Kega ta kinani;  
Ba kota ta nosinosi  
Kaurita i rabobo.

Kega kesana e mamana  
Gudu i ta terei  
Kona wata keta Sapamai  
I ta aurabaita.

14.

A. &amp; M. 254.

**K**E bi sinikarikari?  
 Ki nuagoyo?  
 Ke msiratu, e kau'auvim;  
 Ki yakam.

Kona auraba bitana,  
 Bokana awa'i?  
 Nimanai io baunina;  
 Ke kitai.

Koronana kona kega  
 Bada kununai;  
 E mamana rurirurina,  
 Ke gayoi.

A ta bo'onubanuba  
 Saroba awa'i?  
 Nuagoyo pesarisi;  
 Ke notai.

A ta maratu damanei  
 Suara awa'i?  
 Nuagoyo e kakaba  
 Ta marai.

A ti babai, i na nosi,  
 I na yauniku?  
 Damanina e wadiem  
 Keriso.

A na bosisira robo  
 I ni baisiku?  
 Anela ba Peroveta  
 'Te wona.



15.

A. & M. 107.

**I**ESU ta ni kaivi,  
Tara gairena  
Kota kairavita  
I utusewai.

Baibaita damana  
Iesu taranai.  
Ta panapanana  
Tupetupeni.

Satan i ta kitai,  
I na kiroro,  
Ba i na nagara  
Yagiyagina.

Tara gairena  
Ba ta ni kaikaivi  
Ata Gidua.

16.

A. & M. 134.

**I**ESU KERISO i i yawasa.  
Aleluia!  
Kona Kota ta na tabora.

Aleluia!

Matapa kau keyama,  
Aleluia!

Kona i i nuagoyo.  
Aleluia!

Keriso ata Taupauma,  
Aleluia!

Ta na kaobaigaegaeni.  
Aleluia!

Kaurita i rabobo ;  
Aleluia!

Kona e bi yawasita.  
Aleluia!

Kau Sapama i ge mena, Aleluia!  
 Anela e mamana wasi. Aleluia!  
 Tamana kaurina, Aleluia!  
 Kona e potapotaita. Aleluia!

17.

A. &amp; M. 133.

**T**ABORA ta na ravi  
 Keriso i msiri  
 Ana baipatumina  
 I unarebui.  
 Yasegana ta kitai  
 Ere kadarina ;  
 Bada ta ni kiuruvei  
 Bomsiri menina.

Aleluia ! Keriso  
 Ama Taupaumina  
 Rabobona ki badei.  
 Ke mama damana  
 Dobu ku i saumarei  
 Kadara ku riu.  
 Ki taraparanikai  
 Kata ka ni ruaim.

18.

A. &amp; M. 140.

**I**ESU e yawasa mom,  
 Rabobo i i garukirei ;  
 I bi mesumesuvei  
 Karawaga patumina.

Aleluia !

Iesu e yawasa mom ;  
Kota ta na nosinosi,  
Kairavina rabobo  
Yawasa matauketana.

Aleluia !

Iesu e yawasa mom,  
Ba kaurita i sirage ;  
Ta ta bo'osisiri,  
Kaurina ta na yawasa.

Aleluia !

Iesu e yawasa mom ;  
Ta na mapakiratui.  
I na kaikaiparita,  
Kega kona kana pata.

Aleluia !

Iesu e yawasa mom ;  
I kesina King damana.  
Ba kaurina ta ta nae,  
Ba kaurina ta ta mana.

Aleluia !

19.

A. & M. 135.

**A**LELUIA ! Aleluia ! Aleluia !  
Karaku ta na tabora ;  
Keriso ata Taupauma  
Rabor'aobosiai i gae.

Aleluia !

Kona maranai mara i tom  
Iesu Ana kau Karawaga  
Baibaine si yewoyewonae.

Aleluia !

Kosi anela si kitai,  
Ba kona kosi i wonisi,  
Asi Bada matapa i nae.

Aleluia !

Baidibarai asi yoveyai  
Aposetolo si nagara,  
Iesu kau yove i botu.

Aleluia !

Kosi asi Bada si nosi,  
Yawayawasina si kitai ;  
Kona si bokabakabari.

Aleluia !

Kota kega ta kinani,  
Ta nosinosi kabitamni ;  
Rabor'aobosi i gae.

Aleluia !

20.

A. & M. 302.

**A**LELUIA ! I bomsiri,  
Iesu Sapamai i gae ;  
Rabobona i i gesei ;  
Anela ko tabora.  
I bomsiri, I bomsiri,  
Kega i na rabobo.

Aleluia ! I bomsiri,  
Tamana kaurina  
Kona e kukuyita,  
E bi kwainanita.  
I bomsiri, I bomsiri,  
Kega i na rabobo.

Aleluia ! I bomsiri,  
Nokoi i na potaita.



Kona kaurina rabobo ;  
Kega ta na nagarei.  
I bomsiri, I bomsiri,  
Kega i na rabobo.

21.

A. & M. 207.

**A** KAIYOARI Iesu  
Dobu i i saumarei,  
Baibaimorumorubina  
I berita.

Baigairenita i wainai,  
Yana i i gaire mom,  
Ba nike abamamana  
E nuveni.

Gamona yogoyogona  
I i beyebeyita ;  
Goyona ta ti garui  
Nikasike.

Kanuma monamonam,  
Ke bi genarikai ;  
Mesumesukai ke notai,  
Ba ke botu.

22.

TUNE, A. & M. 4.

**K**AURIKAI ke botu, Bada,  
Kau nuanuakai ke riu  
Kanuma Kao'aobaisiem  
Puyo Berebereyanim.

Kaidamonai ke gakira,  
Yakai ke kasibainubai,  
Naom i ta rauyasega,  
Matakai ke botatari.

Am baibaitai ki boroikai,  
 Am pipiya ki yawasisi,  
 Kam abia ki gesisi,  
 Ba nike rom ke botuvei.

Tama Natu ba Kanuma  
 Yabata Kami Waba God,  
 Tonu ba Bada kesana;  
 Ba ka bokabakabarim.

23.

A. &amp; M. 323.

**B**ADA, kega damaniku  
 Ba ku ta msiratuiku.  
 Wona kesana ke wonei,  
 Ba i ti yawasiku.

Bada, kega damaniku,  
 Nuasineku i puda.  
 Mekabage nike ke riu;  
 Kom ki gaireniku.

Bada, kega damaniku;  
 Ba Iesu ke riu.  
 Biom ba Taram ku berei,  
 Au pataina ku sarobi.

Ke botu niko didibara,  
 Kam Sapamai ke beriku.  
 Nuanuaku ki bonuvei,  
 Am Nuayauyaunai.

24.

A. &amp; M. 537.

**R**OM, kariteiai, niko kau dobuna,  
 Iesu Tarana rom i berita.

Rom awakiai? Kota ta na saibira;  
 Iesu nanakasike i wona.

Rom, nike ta bi nuagoyo ;  
Ba ta na mana Iesu kaurina.

Rom, nike kau dobu goyona  
Iesu nanakasike ta mamana.

Rom, rabobo gwabina ;  
Iesu kau rabobo i i bada.

Nike ta ni abia kobo ;  
Sapama romna i na berita.

25.

A. & M. 320.

**B**ADA, kega ka kinanim ;  
Kaurikai ku mamana,  
Ba nike Kom ka ta nosim,  
Ba ka ta pepetim.

Am pipiya te nosinosim,  
Am puyo ke berisi ;  
Ke bobaimaragasisi,  
Ke kasibainubaisi.

Wonam ka bosisiriei,  
Ka botu ka na kam ;  
Kam Bada pipiyina,  
Tarana ta na toma.

Ba ka ta bosisiriem  
Yakai kom karimiai ;  
Ba ka ti saununurim,  
Bada, Am baibaitai.

26.

A. & M. 32 .

**K**OM Baibaiyawasim,  
Iesu Keriso,  
Kau nuasineikai,  
Bada, ku mamana.

Am baibata gairesi  
 Ke berikai;  
 Ba ama piraga  
 Si na gairena.

Mekabage yakai  
 Ka ni kaikaivim;  
 Ama puyo kaurisi  
 Kao'aobaisiena.

Meyana nuanuakaiai  
 Ke madamana;  
 Sapamai ka na nae  
 Kona sirinai.

27.

**T**AMAKAI, natunatum karaku,  
 Nuanuakai kega si na guga;  
 Niko gudu, Natum pipiya kaurisi  
 Marakesana i tere damanei,  
 Niko wose i gaireaki.  
 Nike ka kaoaobaisikwanim.

28.

A. &amp; M. 349.

**N**UANUAKU karaku  
 Au God ke bosekwai;  
 Ba kega a ni saumarim;  
 A ni karimiai.

Korosenaki naonai  
 A na makabitam;  
 Aku piraga goyosi  
 Bada ki garuisi.



Am baibaitai ki boroiku,  
Ke yauna roboiku;  
Naom a na kayokitai,  
Ba a na pepeta.

Nuanuaku, nimaku,  
Opaku a berim;  
Aku yawasa kairavim  
Ba yebo rabobo.

Tama kaurina, Natuna  
Kaurina kadara.  
Kanuma kaurina yebo  
I na madamara.

29.

A. & M. 7.

**K**ANUMA, Kao'aobaisiem,  
Matapa ku gakira,  
Ba am Ekalesia  
Ku i morumorubi;  
Naomai natunatum,  
Karaku ke msiratu.

Niko gunagunasi  
Bapataito si yauni.  
Kom ku bopaparisi,  
Ku i beyebeyisi;  
Asi rori si taini  
Si ni saumsiratuim.

Ki baita neubuisi,  
Si na maragata mom.  
Satan kasi abia  
Si ni owa kikisi,  
Ba am yarayarakisi  
Turinai ke pananisi.

Wona kao'aobaisiena  
 Matamai si na baiavi,  
 Niko yaroterenai  
 Baibaita si na yauni;  
 Ke msiratu, Kanuma,  
 Kaurisi ke mamana.

30.

A. &amp; M. 271.

Λ KAOBAIYOYOBANIM,  
 O Iesu, karaku;  
 Ba a ti saununurim,  
 Bada ba Kwainaku;  
 Gwabikuai ke mana;  
 A nosi kabitam,  
 Kega a ni siwana,  
 Kom ku ti naoviku.

Dobu ana dudura  
 Te mapipiniku :  
 Ba ponaguguna  
 Te pesapesara :  
 Abia pesarisi  
 Te kwanokwanoiku :  
 Ki taraparaniku  
 Aku Bada Iesu.

Am baiponasimsimna  
 A ta nonorisi;  
 A ti yagisieie,  
 Ba kom ki gesiku;  
 Ba gamom i na rakata,  
 Ba a na nonori;  
 A na bosisiriem,  
 Kom, aku Taupauma.

Ku kaobaiyoyobani  
 Te bi saununurim,  
 Kom kosi kau kadara  
 Si na madamana.  
 Ba a kaobaiyoyobani,  
 A bi yarakim;  
 Baibaita ke beriku,  
 Bada ba Kwainaku.

Kibim a ta kinani,  
 Kosiai a ta nae;  
 Ba a ti saununurim  
 Am baimaragatai;  
 Iesu, ke aurabaiku,  
 Ke bokikisiku,  
 Sapamai ki gamoiku,  
 Au Baibaiyawasim.

31.

A. &amp; M. 439.

**B**ADA e bi abia,  
 Ieova Natuna;  
 Ana boka ta kinani,  
 Kona tarotarona.

Kotoi Bada i ni ruai,  
 Ba i ni abia,  
 Ba i ni saununuri?  
 Kona i ti Bada.

Kota ta ni nuagoyo,  
 Ta ta bosaburere,  
 Ba ta ta bosisiriei,  
 Nanakasike ta ta nae.

Kau naona Stephen  
 Babada matasiai,  
 Iesu sapamai i nosi,  
 Ba kona i na wonei.

Tautaulatonina  
 Muri si maragata,  
 Ba kaikarakarasinai  
 Kega si nagara.

Pipiya mutusi kiramai,  
 Mutusi leonei,  
 Abiabilia si boaisi,  
 Si siragana roboisi.

Koroto kaikapona  
 Sapamai te nena.  
 Ba a ti saununurisi,  
 Iesu, Am baibaitai.

32.

A. &amp; M. 219.

**D**AVID Natuna Bada  
 Ta ni egualauei.  
 Sirina i na binei  
 I na botumena.  
 Ba patupatumisi  
 I na tombaunisi;  
 Baibada kabitamna  
 I na madamana.

I ni taraparana,  
 Ba i ni baisita;  
 Ba tou i ni tabora  
 Botuna gubanai.  
 Matapa i rabobo,  
 Kau Sapamai i gae.  
 Gawara monikina  
 E bōkabitamni.

Kaikaiwabo Taupauma  
 Si na utukeikei;



Ba ere-onoata  
Ta ni kaikaivi.  
Taupauma i kesina  
Mamadamanina,  
Yabata ta ta mana  
Ta raraupariei.

33.

A. & M. 164.

**T**AMA Sapamai ikesim  
Kawapata ku panani;  
Goyokai ke kinanikai  
Ke bi nuanuanikai.

Wona Morapim, Natu God  
Ama Baiyawasa bitam;  
Goyokai ka utukeikei  
Ke bi taraparanikai.

Kanuma Mamadamanim,  
Baimaragata Bitam Kom,  
Ka raraupari ke nosi,  
Ki baita kabitamnikai.

Kanuma, Tama, Natuna,  
God kesana ere Am Tonu,  
Matamai ka mamana wasi  
Gairenai ki bonuvikai.

34.

A. & M. 277.

**K**AURIM a ta botu,  
Au Bada God,  
Au keta ke binei,  
Ki naoviku,  
Am wona kesianina,  
Kau gwabim aku God,  
Kom kau gwabim.

Jacob nikasike  
 A negoyo,  
 Pomai kunuana  
     Akima mom.  
 Meumeukuai  
 Kau gwabim aku God,  
     Kom kau gwabim.

Noi aku wawana  
 Ki beyiku,  
 Sapamai kau dobu  
     Anela kosi.  
 Ba si na oriku,  
 Kau gwabim aku God,  
     Kom kau gwabim.

A na bomsiri wasi,  
 A na nosim,  
 Nanakasike ba  
     A na nena.  
 Au nuagoyonai,  
 Kau gwabim aku God,  
     Kom kau gwabim.

35.

A. &amp; M. 282.

**B**AINAO bitam, ke nosiku  
     A oreorim wasi,  
 Ba ke kayoaurabaiku,  
 Kega a na peku.

Dobu, bio, Satan kosi  
 Si i tompipiniku,  
 Waroiku te waiwaine wasi  
 Bada ke naveyisi.

Si ta ponaguguviku  
 Maramaragasisi

O Bada ke kaipariku,  
Ba Kom ki baisiku.

Mesumesu damaniku  
Ikesim a nosim,  
Ta abia si ta botu,  
Kauriku ke daru.

36.

A. & M. 191.

**I**ESU au Bada, opaku  
Aku raupari ke nosi  
Ke burubaigaireniku,  
Bada ke bi gaireniku,  
Iesu au Bada, a nosim,  
Ba a ti nuayaunyaunim.

Matapa a ta nuvenim,  
Ba a ti nuayaunyaunim ;  
A na wosei kabakaba  
Ku rakata tawaniku ;  
Iesu au Bada, a nosim,  
Ba a ti nuayaunyaunim.

Awa'i kaurisi ku yauniku ?  
Ku bi nuagaireniku ?  
Ku bi poneturaniku ?  
Ba a bi sake Kom kaurim.  
Iesu au Bada, a nosim,  
Ba a ti nuayaunyaunim.

Iesu kaurim au tabora  
A na tabora damanei ;  
Ba tupaku karimiai  
Aku Baibaiyawasa Kom.  
Iesu au Bada, a nosim,  
Ba a ti nuayaunyaunim.

37.

A. &amp; M. 198.

O IESU, ku msimsiri  
 Guduku gwabinai ;  
 Riu ku potapotai  
 Kau nuanuaku ;  
 A bi tepakumara,  
 Rom aku kaiwabo ;  
 Awa'i kaurisi a i gesim,  
 Baiyawasa Bitam ?

Ku raukesakesara ;  
 Nimam si bauni wasi,  
 Tepamai rururina,  
 Ba mataokovim.  
 Wadiyina morapa  
 Ku pota kabitam ;  
 Ba kega aku pata  
 Goyo damaniku.

O Iesu ku kukuya,  
 Ku bi ponasimsim ;  
 Kau gubam a rabobo,  
 Ma ke saiviriku?  
 Bada, a i nuagoyo,  
 A tombaubauniku ;  
 Bada, goyo ke riu,  
 Ke mamadamana.

38.

A. &amp; M. 199.

KOM ama keta ikesim,  
 Baibaita bitana,  
 Ba tama ka nuveni wasi  
 Kaurim ka vera mom.

Kom Baisauwona ikesim,  
 Ki beyebeyikai ;



Baibainuasuya Bitam,  
Ke bi gairenikai.

Kom Baiyawasa ikesim,  
Karawagai ku gae ;  
Ba kosi si na nosim wasi  
Kaurim si na nenaë.

Bada ke bereberikai,  
Keta ka na kuiri,  
Baisauwona, Baiyawasa,  
Ka na yauna roboi.

39.

TUNE 225, A. & M.

**K**AURIM ka botubotu  
Bada, niko mara ;  
Ke botu ba Am pipiya  
Ke nosi kikisi.

Ama piraga goyo  
Ki buruburuei ;  
Wonam ka na baiavi ;  
Ki beyebeyikai.

Ba, Bada, am Kanuma  
Kaurikai ki porai.  
Keta Baibainaovina,  
Ba i ni baisikai.

40.

TUNE 108, A. & M.

**I**ESU ama Baibaiyawasim,  
Kaurim ka msimsiratui.  
Kao'aobaisiei damanim  
Kam karaku ke riunikai.

Bada Iesu, yām gairena,  
 Ka ni kaikaiwa damanim.  
 Nuanuam ka yauyauni,  
 Ba pipiyim ku berikai.

Vedu baiyawasina  
 Ke beriku, a na tomani ;  
 Ba nike a na oreorim,  
 Kam waba a na kaobaisiei.

Tama God, wape Natu God,  
 Ba Kanuma Kao'aobaisiena,  
 Ababokabakabara  
 Kaurisi i na madamana.

## 41.

A. &amp; M. 436, 2ND TUNE.

**G**OD matanai pesarisi te tabotabora ;  
 Aleluia, Aleluia, Aleluia, Bada Kom  
 Gwamegwame rautainisi koroto te mamana,  
 Ere poepoesi ba baibadisi kaurisi.

Peroveta, Patriaka, Keriso si naovei  
 Kaiwabo, Aposetolo, Mata Kao'aobaisiesi,  
 Sebasebare, baibaine, ana rarauparisi  
 Duvuna Kaikorotona te tabotabora.

Si i roroki, si rabobo, si patuma matapa ;  
 Kega si i sinimaya, si msiri kabitam ;  
 Iesu taranai gairena si i toa meyisi ;  
 Karaku Paradiseai te gaigaire damana.

God Damanam, Yaseganim, ama Emanuela,  
 Am baikesanina kosi, ka mamayabata.  
 Dobuai ba Sapamai ka na bokabakabarim,  
 Kom God Tama, God Natuna, bayebo Kanuma God.

42.

A. &amp; M., 306.

I ESU kau wabana  
Ta na pepeta.  
Kona Taupaumina  
Ere kadarina.  
Tamana i waini  
I ti badita;  
Pusirinai Kona  
Wona Morapa.

Matapa gamonai  
Dobu i dagu.  
Sapama ba Anela  
Kona i i taunisi,  
Tupasi i wosisi  
Kao ba Yaobunua,  
Ere-onoasi  
Monamonasi.

Tamarai i botu  
Ere biona.  
Wabana ta i wabei,  
Baibaiyawasina.  
Waba monikina  
I madamana.  
I bomsiri mena,  
Ere Wabana.

Kau nuanuata  
I na yoveboa.  
Ta na kaobaisiei.  
Ta ni nuayauni,  
Ba ta na nagarei,  
Ata Tama God  
Baibaiyawasina  
Bada Keriso.

Niko Bada Iesu  
 I na nemena,  
 Ere kadarina,  
 Ere Anelana.  
 Dobu pesarisi  
 Asi Kaiwabo,  
 I na madamana  
 Taupaumina.

43.

CHURCH HYMNS 480.

**A**T'A Bada Iesu  
 Ta ni kaikaivi.  
 I i beyebeyita,  
 Ta ta nonori.  
 Matapa baidibarai  
 Ta mama yepo.  
 Satani ta bosisiri  
 Yāna goyona.  
     Ta na vera neubua  
     Ta ni abia.  
     Matata senana  
     Bada i terei.

Taupauma Keriso  
 I i naovita.  
 Ta ni saununuri,  
 I ni baisita.  
 Satan i i sugurita,  
 Ba ta ti gesei.  
 Nagarita i na vera,  
 Ere duvuna.

Ere-onoami  
 Ta ti kesani.  
 Kaiwabo kesana  
 Giuna yebo.



Ata Taupaumina  
 Ta ni kadari :  
 Anela te raviravi,  
 Pipiya yebo.

44.

A. &amp; M. 333.

**K**ERISO matapa  
 I pipiyaike,  
 Wadiwadiyina  
 I i yawasita.  
 Wona bapataito  
 Ta ti saunotai,  
 I ni ata Bada  
 Potapotaina.

Kona kau nimana  
 Si kaiterita,  
 Bainagara kega  
 E mamana wasi.  
 I kaoyoyobana,  
 Ta ni nosi mom,  
 Baiyakam Bitana  
 I na pewartai.

Kona nina debuai  
 Ta kita kabai ;  
 Saba i kabarita  
 Ta i siniravi.  
 Rabobo sirinai  
 Ta na bomsiri,  
 Naona gairena  
 Ta ni saukitai.

Baipota bitana  
 I na madamana,  
 I na aurabaita,  
 Kau baiyakamna

Kwapu kau gairesi  
 I ni dauvita.  
 Namai soya kega ;  
 Namai kega tou.

Iesu ama Bada,  
 Kom kairavikai  
 Si tuparatuim,  
 Baiyawasikai.  
 Am nuayauyauna,  
 Am kaiparina,  
 Ka ta notanotai,  
 Ke bi baisikai.

45.

A. &amp; M. 240.

**A** M Basekwa sapamai  
 Te gaigaire kabitam.  
 Am basekwa dobuai  
 Monikisi, O Bada.  
 Yaku e goyogoyo  
 Am pipiya kaurisi,  
 Naom a ti saukitai  
 Am wadiwadiyisi.

Bunebune matapa  
 I nemena kau aka.  
 Ama aka kom kaurim,  
 Ama Baiyakam bitam.  
 Dobuai ka siwana,  
 Ka nene kabakaba ;  
 Ka msibira Kom kaurim,  
 Baibaitaraparanim.

Am Bo'osisirisi  
 Ku bi kam damanisi :  
 Ba ku kaikaiparisi.  
 Kega meka te goyo

Maramaragasisi  
Si na yewo kabitam ;  
Kau sapama kau gwabim  
Si na vera kobo.

Bada, ki karikuai ;  
Ke bi nao damanikai,  
Ke bo'okabariku.  
Kaurim ke taitainiku.  
Aku Yasegana Kom,  
A'u Baiabia Bitam.  
Baibaibaisim ikesim,  
Ki nuanuaniku.

46.

S. & S. 17.

**K**OM gairem, Tamakai ;  
Pari ke nonori ;  
Kama Kam ku berikai ;  
Yakai ka bi kaikaivim.

Kom gairem, Keriso,  
Pari ke nonori.  
Yakai pipiya goyokai ;  
Kom ku ti yawasikai.

Kom gairem, Kanuma,  
Pari ke nonori.  
Yakai maruapikai  
Kom ke beyebeyikai.

47.

**T**A na tabora Iesu ; Sapamai i gakira ;  
Ata Bada Iesu.  
Aleluia, Iesu ; Kairavita i rabobo ;  
Aleluia Iesu.

Ta na tabora Iesu ; I tuparatui ;  
Ata Bada Iesu.

Ta na tabora Iesu ; Kau Sapama i gemena ;  
Ata Bada Iesu.

Ta na tabora Iesu ; Kona i i yawasita ;  
Ata Bada Iesu.

48.

S. &amp; S. 1.

**N**OI turata matakira  
Te kotokotoi.  
Ata Bada karaku  
E msimsiratui.  
Kona mana, A botubotu.  
Iesu i wona.  
Kota ta na kaobeyei,  
Damanina Bada.

Satan Baibaiyabiyina  
I ni owa.  
Pipiya mom si na peku ;  
Ta ta ma kaba.

Ata parage e botubotu :  
Gisuma i tou.  
Bada Wabanai Satani  
Ta ni gesei.

Bada Ana baibaita  
I na berita ;  
Ba ta ni maragata,  
Kona Yabata.



49.

S. & S. 72.

**I**ESU i kausaniku.  
 Iesu i kausaniku.  
 A na wona damana,  
 Iesu i kausaniku  
     Aleluia, ta na tabora ;  
     Aleluia, Iesu.  
     Aleluia, ta na tabora ;  
     Kwainata Iesu.

Iesu Wonana,  
 Iesu Wonana,  
 Nonora a waiwainei.  
 Iesu Wonana.

Jehovah, Tamaku,  
 Jehovah, Tamaku,  
 I bi nuayauyauna,  
 Jehovah, Tamaku.

50.

A. & M. 193.

**B**AIBAINUAYAUYAUNIM,  
 Kom kaurim a ta botu.  
 Boga kau yoyona,  
 Iesu, ki yawasiku.  
 Ki terebaibuniyiku ;  
 Sibe a ta nagarei ;  
 Kaiwakuna kom kaurim ;  
 Kanumiku ke gamoi.

Iesu a nosinosim ;  
 Kega kotoi kesana.  
 Kega ki saumariku,  
 Ke kasibainubaiku ;  
 Kom a oreorim,  
 Ki tainabainegiku :

Baibaisina kesana  
Kega meka i ta mana.

Wonam kega a nosi ;  
Nuanuaku i puda.  
Nuasineku baiyeka  
• I ti gaireniku.  
Baibaiyawasina Kom,  
Kamokuai ke mana ;  
A na bosisiriem ;  
Am sapamai a na nae.

51.

A. &amp; M. 280, 2ND TUNE.

**I**ESU, yakai karimiai,  
Ba Kom ke kaiparikai ;  
Kom ama Baibaiyawasim,  
Ki tainabainegikai.

Iesu, yakai karimiai ;  
Ama piraga goyo  
Kau matam ka na baiavi,  
Ba ki buruburuisi.

Iesu, yakai karimiai ;  
Kom ke bopaparikai ;  
Bada, yakai ke rauririsi,  
Ba ki nuagaire.

Iesu, yakai karimiai ;  
Baibaita ke berikai,  
Ba ka ni maragata ;  
Saibira ka na saivirei.

Iesu, yakai karimiai ;  
Kau dobu ke potaikai,  
Sirinai ka na rabobo  
Sapamai ke aurabaikai. Amen.

52.

A. &amp; M. 370.

**T**AMAKAI mamadamanim,  
 Yarom boga yoyona  
 I terei, ba paratasi  
 Baisaubona ku i gesei.  
 Pipiya kau boga te nenaē,  
 Kaurisi ama pari ke nosi.

Keriso sibe ku wonei,  
 Ba niworoa i daua.  
 Okoa, Boga asi Bada  
 Kau tepana kom ku yewo.  
 Pipiya kau boga te nenaē,  
 Kaurisi ama pari ke nosi.

Kanuma Kao'aobaisiem,  
 Bogai ku i turamakirem;  
 Sibe maragasina,  
 Wonam i bosisiriei.  
 Pipiya kau boga te nenaē,  
 Kaurisi ama pari ke nosi.

Tirinity gairedamana  
 Turaturakai ke potaisi.  
 Kau boga te nene wasi,  
 Ki kaipara kabitamnisi.  
 Ba kau boga ba kau dobu  
 Ka na bokabakabarim.

53.

A. &amp; M. 236.

**J**ERUSALEM aku yove  
 Kaidamo mamanim;  
 Saibira i na kakaba,  
 Ba kom a na kitaīm.

Jerusalem, nuanuaku  
 Ku yauna damanei ;  
 Ba a na potai sirinai  
 Kaurim a na botu.

Kom am gudu gairesi  
 Kamosiai a na riu ;  
 Au keta baibaiyawasisi  
 A na yewoyewo.

Kega awaki pudana  
 Nakai i ta riu ;  
 Ega bainuagoyo  
 Kom am kau mamana.

Rabobo niko kau dobu  
 Ba baisinigoyo  
 Ba aku bainuagoyo  
 A ni saumarisi.

Kau kamom Bada Keriso  
 Yabata te mamana.  
 Ba aku siri a na nae,  
 Ba nakai a na mana.

Jerusalem, aku yove  
 Kaidamo mamanim ;  
 Saibira i na kakaba,  
 Ba kom a na kitaim.

54.

A. &amp; M. 92.

**K**AU kupuramom ku nae  
 I kesim ku mamana ;  
 Mara 40 ku i sia,  
 Satan ku i gesei.



Kao i rarabunuim,  
 Nuba i sewasewai;  
 Akima kunuana,  
 Ba tano Am mamana.

Iesu, Kom kairavikai,  
 Ku i nuagoyo.  
 A ni sia rautainim;  
 A na raupari damana.

Satan nike kaurikai  
 I ta botu rubai;  
 Ba Kom ku ti baisikai,  
 Ba ka na maragata.

Nikasike Am romna  
 Nike i na tupua;  
 Anela i na gakira,  
 Yakai si ni baisikai.

Iesu Kom ke potaikai,  
 Gwabimiai ka na mana;  
 Ba Isita maranai,  
 Ka na nosidamanei.

55.

TUNE, A. &amp; M. 328.

**K**OMI Bada kaurina  
 Ko bi yaraka,  
 Wonana ko na nosi;  
 Ko bosisiriei.

Kibe ko na bobunagi,  
 Ba ko ni bausi;  
 Ba komi ko ni tairoro;  
 Kau naona ko na nae.

Karaku ta ta wona,  
Bada i ta botu ;  
Yarona i na kotoi,  
Ba ko na kinani.

Nanakasike ko ta mana,  
Ba Bada i ta botu ;  
Bada yabata ko na gae ;  
Ko ni nuagaire.

Kam baiabina Keriso  
Ana 'ipiya kaurisi  
Anela ere kadarisi  
Kaurisi si na mana.

56.

A. &amp; M. 463.

GOD Tamana, Natuna,  
Kanuma, Trinity,  
Ama pari ke nosi ;  
Ki taraparanikai.

Iesu, ku kairabobo,  
Yakai ka ta yawasa,  
Ku ni buibuiyikai,  
Iesu, ke nonorikai.

Ta marai ke orikai,  
Dobu ka ni saumarei,  
Ama Baibaiyawasim,  
Iesu, ke nonorikai.

Ama wose goyosi  
Ki buruburuisi,  
Ke bi poepoekai,  
Iesu, ke nonorikai.

Ke bi buibuiyikai,  
 Ke bi maragasikai,  
 Iesu ki gairenikai ;  
 Iesu, ke nonorikai.

Ka na boyokoyokoim,  
 Ama Baibaiyawasim,  
 Ki morumorubikai ;  
 Iesu, ke nonorikai.

Kau kadara damana,  
 Ere yaseganina,  
 Kau gawara baiakam,  
 Iesu, ke aurabaikai.

Am 'ipiya gairesi,  
 Yebo ka ni kaikaivim,  
 Kau sapama ba kaurim ;  
 Iesu, ke aurabaikai.

57.

. A. &amp; M. 516.

**K**OMI Bada kau naona,  
 Turakai, ko na pepeta.  
 Kona dobu Wosewosena,  
 Ba Kona i ta pupuni.

Kota kega ta i baisi,  
 Ba kona pipiya i wosei ;  
 Kana sipu siwanisi  
 I aurabana meyisi.

Ana 'ipiya i gamoita,  
 Kanumita, pipiyita.  
 Me'o tabora i na mana,  
 Ba ma ta na piragei ?

Kau naom ka ni duvu :  
Gamokai sapamai i na gae ;  
Ba dobu pusirina  
Kom si na kaobaigaegaenim.

PRINTED BY WILLIAM CLOWES AND SONS, LIMITED, LONDON AND BECCLES.

MOORE COLLEGE  
LIBRARY





